

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

**ZAKON
O KLASIFIKACIJI ZANIMANJA U FEDERACIJI BOSNE I HERCEGOVINE**

Sarajevo, juni 2012. godine

PRIJEDLOG ZA DONOŠENJE ZAKONA PO SKRAĆENOM POSTUPKU

U skladu sa članom 172. Poslovnika o radu Predstavničkog doma („Službene novine Federacije BiH“, br. 69/07 i 2/08) i članom 164. Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“, br. 27/03 i 21/09), predlažem da se **PRIJEDLOG ZAKONA O KLASIFIKACIJI ZANIMANJA U FEDERACIJI BOSNE I HERCEGOVINE**, razmatra i donese po skraćenom postupku, jer nije u pitanju složen i obiman zakon, a postoji neodložna potreba za njegovim donošenjem, obzirom da se istim treba osigurati primjena jedinstvenog standarda-klasifikacije zanimanja na području cijele Bosne i Hercegovine.

Postojeći Zakon o standardnoj klasifikaciji zanimanja u Federaciji Bosne i Hercegovine („Službene novine Federacije BiH“, broj 22/04) nije usklađen sa Odlukom o uvođenju i primjeni klasifikacije zanimanja („Službeni glasnik BiH“, broj 100/10), kao ni sa Međunarodnom standardnom klasifikacijom zanimanja (International Standard Classification of Occupations, ISCO-08), koja se prema preporuci Međunarodne organizacije rada primjenjuje kao međunarodni standard.

ZAKON

O KLASIFIKACIJI ZANIMANJA U FEDERACIJI BOSNE I HERCEGOVINE

I - Opće odredbe

Član 1.

Ovim zakonom se utvrđuju pojam i svrha Klasifikacije zanimanja u Federaciji Bosne i Hercegovine (u daljem tekstu: Klasifikacija zanimanja), subjekti koji su dužni primjenjivati Klasifikaciju zanimanja, definiše pojam zanimanja, te utvrđuje način donošenja Klasifikacije zanimanja.

II – Pojam i svrha Klasifikacije zanimanja

Član 2.

Klasifikacija zanimanja je obavezan statistički standard, koji su dužni primjenjivati svi organi vlasti, privredna društva, ustanove i druga pravna lica u Federaciji Bosne i Hercegovine koja vrše evidentiranje, prikupljanje, obradu, analiziranje, prenos i iskazivanje statističko-analitičkih podataka, bitnih za praćenje stanja i kretanja na socijalno-ekonomskom području.

Član 3.

Klasifikacija zanimanja upotrebljava se kao obavezan standard za sve korisnike iz člana 2. ovog zakona, kada se iskazuju podaci o zanimanjima, naročito u području statistike, migracija stanovništva, zapošljavanja, profesionalne orijentacije i obrazovanja.

Član 4.

Klasifikacija zanimanja se zasniva na Međunarodnoj standardnoj klasifikaciji zanimanja, koja se prema preporuci Međunarodne organizacije rada primjenjuje kao međunarodni standard, čime se osigurava međunarodna uporedivost podataka o zanimanjima.

Član 5.

Klasifikacija zanimanja se koristi kao statistički standard za razvrstavanje zanimanja u službenim, odnosno administrativnim zbirkama podataka (evidencije, registri, baze podataka), u statističkim istraživanjima i u statističkim registrima, čime se obezbjeđuju konzistentni podaci za statističko, analitičko i naučno praćenje strukture zanimanja aktivnog stanovništva, kao i potraživanja za poslom.

III - Pojam zanimanja

Član 6.

Zanimanje je statističko-analička kategorija u koju se razvrstavaju poslovi i radni zadaci srodni po sadržaju i zahtjevnosti, koje je obavljala, obavlja ili bi mogla obavljati u pravilu jedna osoba koja posjeduje odgovarajuća znanja, sposobnosti i vještine.

IV – Struktura Klasifikacije zanimanja

Član 7.

Struktura Klasifikacije zanimanja je sistematski popis hijerarhijski povezanih grupa zanimanja, označenih šiframa i nazivima.

Hijerarhijska struktura i početak primjene Klasifikacije zanimanja definišaće se Odlukom o klasifikaciji zanimanja.

V – Način donošenja

Član 8.

Klasifikaciju zanimanja odlukom propisuje Vlada Federacije Bosne i Hercegovine, na prijedlog Federalnog zavoda za statistiku.

Rok za donošenje odluke o klasifikaciji zanimanja je 30 dana od dana stupanja na snagu ovog Zakona.

VI - Prelazne i završne odredbe

Član 9.

Danom stupanja na snagu ovog zakona prestaje da važi Zakon o standardnoj klasifikaciji zanimanja („Službene novine Federacije Bosne i Hercegovine“, broj 22/04).

Član 10.

Ovaj zakon stupa na snagu narednog dana od dana objave u „Službenim novinama Federacije Bosne i Hercegovine“.

OBRAZLOŽENJE ZAKONA O KLASIFIKACIJI ZANIMANJA U FEDERACIJI BOSNE I HERCEGOVINE

I USTAVNI OSNOV

Ustavni osnov za donošenje Zakona o klasifikaciji zanimanja u Federaciji Bosne i Hercegovine sadržan je u članu IV. A.20.(1) d) Ustava Federacije Bosne i Hercegovine prema kojem je Parlament Federacije BiH nadležan za donošenje zakona o vršenju funkcija federalne vlasti.

II RAZLOZI ZA DONOŠENJE ZAKONA

Agencija za statistiku Bosne i Hercegovine donijela je Odluku o uvođenju i primjeni klasifikacije zanimanja („Službeni glasnik BiH“, broj 100/10) koja se zasniva na Međunarodnoj standardnoj klasifikaciji zanimanja (International Standard Classification of Occupations, ISCO-08), koja se prema preporuci Međunarodne organizacije rada primjenjuje kao međunarodni standard. Članom 8. navedene odluke utvrđena je potreba usklađivanja sa navedenom odlukom drugih klasifikacija zanimanja koje se primjenjuju na teritoriji Bosne i Hercegovine.

Usklađivanje sa propisima donesenim na državnom nivou propisano je i članom 12. Zakona o standardnoj klasifikaciji zanimanja u Federaciji Bosne i Hercegovine („Službene novine Federacije BiH“, broj 22/04) gdje je utvrđena obaveza usklađivanja ovog zakona sa odredbama odgovarajućeg zakona kojeg donese Parlamentarna skupština Bosne i Hercegovine u roku koji bude određen tim zakonom.

Navedena materija trenutno je uređena Zakonom o standardnoj klasifikaciji zanimanja u Federaciji BiH („Službene novine Federacije BiH“, broj 22/04) i Odlukom o standardnoj klasifikaciji zanimanja u Federaciji Bosne i Hercegovine („Službene novine Federacije BiH“ broj 40/04 i 26/09) koji nisu usaglašeni sa Odlukom o uvođenju i primjeni klasifikacije zanimanja („Službeni glasnik BiH“, broj 100/10), kao ni sa međunarodnim standardima.

Donošenjem ovog zakona i podzakonskih propisa osigurat će se usporedivost i kompatibilnost statističkih standarda Federacije Bosne i Hercegovine sa standardima Evropske Unije i doprinijeti razvoju jedinstvenog ekonomskog prostora u Bosni i Hercegovini, kao jednog od preduslova za približavanje Bosne i Hercegovine Evropskoj Uniji.

Kako je radi usklađivanja Zakona potrebno izvršiti izmjene u više od 50% teksta Zakona, to je Federalni zavod za statistiku pripremio novi tekst Zakona o klasifikaciji zanimanja u Federaciji Bosne i Hercegovine.

Predlažemo da se ovaj zakon donese po skraćenom postupku, jer nije u pitanju složen i obiman zakon, a postoji neodložna potreba za njegovim donošenjem, obzirom da se istim treba osigurati primjena jedinstvenog standarda-klasifikacije zanimanja na području cijele Bosne i Hercegovine.

III NAČELA NA KOJIMA SE ZASNIVA ZAKON

Osnovna načela na kojima se zasniva Zakon:

1. Načelo primjene jedinstvenih metodoloških standarda
Podrazumijeva obavezu primjene jedinstvenih standarda i metodologija u provođenju ovog Zakona na području cijele Bosne i Hercegovine.

2. Načelo otvorenosti i međunarodne saradnje
Odnosi se na potrebu poređenja podataka s podacima drugih zemalja.

3. Načelo racionalnosti i efikasnosti
Upotreba najracionalnijih izvora podataka, što podrazumijeva i preuzimanje podataka iz jedinstvenih registara, evidencija koje moraju biti urađene primjenom istih standarda i metodologija.

4. Načelo koordinacije i razmjene podataka
Podrazumijeva koordinaciju i saradnju među svim nadležnim institucijama na svim nivoima, što je uslov korištenja propisanih jedinstvenih standarda i metodologija.

IV OBRAZLOŽENJA POJEDINIH PREDLOŽENIH PRAVNIH RJEŠENJA

Prijedlog zakona o klasifikaciji zanimanja u Federaciji Bosne i Hercegovine sadrži 10 članova.

U članu 1. utvrđena je oblast koju ovaj Zakon reguliše.

U članu 2. utvrđeno je da je Klasifikacija zanimanja obavezan statistički standard, kao i subjekti koji su je dužni primjenjivati

Članom 3. utvrđeno je u kojim situacijama su subjekti iz člana 2. dužni upotrebljavati Klasifikaciju zanimanja.

Članom 4. utvrđeno je da se Klasifikacija zanimanja zasniva na Međunarodnoj standardnoj klasifikaciji zanimanja čime se osigurava međunarodna uporedivost podataka o zanimanjima.

U članu 5. utvrđeno je da se Klasifikacija zanimanja koristi u službenim, odnosno administrativnim zbirkama podataka (evidencije, registri, baze podataka), u statističkim istraživanjima i statističkim registrima.

U članu 6. utvrđena je definicija zanimanja.

Članom 7. utvrđena je struktura Klasifikacije zanimanja.

Članom 8. utvrđen je način i rok za donošenje Klasifikacije zanimanja.

Članom 9. propisano je da stupanjem na snagu ovog Zakona prestaje da važi Zakon o standardnoj klasifikaciji zanimanja („Službene novine Federacije Bosne i Hercegovine“, broj 22/04).

Članom 10. propisano je da Zakon stupa na snagu narednog dana od dana objave u „Službenim novinama Federacije BiH“.

V FINANSIJSKA SREDSTVA

Za realizaciju Zakona o klasifikaciji zanimanja u Federaciji Bosne i Hercegovine nisu potrebna finansijska sredstva.